

**Asean-SCC Pilih Satu Projek Kebudayaan Untuk Dilaksana Dalam Tiga Tahun
Bernama
10 Julai, 2012**

KUALA LUMPUR, 10 Julai (Bernama) -- Mesyuarat Jawatankuasa Kecil Kebudayaan ASEAN (Asean-SCC) kali ke-13, akan memilih satu projek kebudayaan hasil cadangan negara anggota untuk dilaksanakan dalam tempoh tiga tahun, kata Ketua Setiausaha Kementerian Penerangan Komunikasi dan Kebudayaan, Datuk Seri Kamaruddin Siaraf.

Beliau berkata projek kebudayaan yang akan dipilih itu, dinilai berdasarkan kriteria yang ditetapkan pada mesyuarat Menteri-Menteri Kebudayaan dan Kesenian Asean (AMCA) di Singapura, Mei lalu.

"Antara kriteria ditetapkan AMCA ialah projek kebudayaan yang bakal dilaksanakan memberi fokus kepada golongan muda, dan perlu pastikan projek itu memberi kebaikan kepada penduduk ASEAN.

"Projek kebudayaan itu juga adalah projek utama dan mempunyai peruntukan sebanyak US\$200,000 (US\$1 = RM3.18) untuk dilaksanakan. Tiga negara anggota iaitu Malaysia, Indonesia, dan Singapura telah mengemukakan cadangan masing-masing untuk dinilai oleh jawatankuasa ini," katanya kepada pemberita selepas merasmikan mesyuarat tersebut, di sini, Selasa.

Beliau berkata hasil mesyuarat dan pemilihan projek yang akan dilaksanakan akan dibentangkan kepada Jawatankuasa Asean Mengenai Kebudayaan dan Penerangan (Asean-COCI).

-- BERNAMA

Hak Cipta Terpelihara © 2012 BERNAMA

Source: <http://www.bernama.com/bernama/v6/bm/newsindex.php?id=679331>